

KOLOSAS

Hini oma'-atan tay an libju

Hitay an tula' ja intolong Apostol Paul hachi namati ad Kolosas anohan pfuglai ad Asia an negpong hichid Efeso hi pfutajan omarkhaw. Pfuu-un hi Paul chi i nangte-a ay ni tamun Apo Jos hichi ja agkhuy na tinnig hay hachi namati, muti gwa hini otong an pani-ar na ay chicha, ja ikhimoh na khu an mangekalalakhan ay chicha.

Chengngor Paul an gwa hana immuy ad Kolosas an khun muntudtuchu hi nehalla. Hay ituchu cha ja maphod hi Apo Jos muti pfu-un hijay Nampfu ay tay lota, ti gwacha anu hana napukhit an achi matikhaw an gway apfalinana ja chicha anu chi nangephod ay tay lota. Hotti an amin hana gwah to lota ja napukhit cha. Hay ehongpfat Paul ja hi Apo Jos chi Nampfu ay tay lota ja hi Hesu Kristo chi nangpa-apjaana (1:16). Ja enapfak Kristo an amin chi napukhit chin natajana ay ni kros, hotti ma-id i ta-o toma'tan hay hachi napukhit an espiritu (2:9-10).

Hay oha hi khun cha ituchu ja napukhit hitay achor. Hotti achi cha apfuluton an immali hini Mamahhod an numpfalin hi takhu. Ja achi anu mapfalin an mepfakhat hini Mamahhod hi kros. Hotti hay pannig cha ay Jesus ja un pfanig, wенно pfu-un hija hini Mamahhod. Hay ehongpfat Paul ja gwa an amin ay Kristo hini kinajos Apo Jos (1:19). Ja hi Kristo chi natoy

ta gway aton chi pfahor an mapakawan (1:19-20). Hotti importante an hana namati ja achi cha mehalla ta i cha unuchon hana paniyaw ja hana in-urchin chi takhu, ta hi Kristo chi unuchon ja punhocholan cha.

¹ Ha-in hi Paul an numpfalin hi apostol Hesu Kristo, ti hitay chi podhon Apo Jos. Ja hitay nun-ibpfa' heto ja hi Timoti an akhi ta-o.

² Tayya an muntula' ami ay cha'ju an nasan-tuwan ja mapagtarkan an a-akhi hina ad Kolosas ti nidchum ta-o an amin ay Kristo.

Hi Apo Jos an Ama ta-o chi mangkhohkhan ay cha'ju ja mangchat hi pomhochan chi pi'takhuwan ju.

Chin nangkalalakhan Paul hay hana namati ad Kolosas

³ An amin chi pangkalalakhan mi ay cha'ju ja khun ami munyaman ay Apo Jos an Aman Hesu Kristo an Apo ta-o,

⁴ ti chenggor mi hini oma'-atan ni pammati ju ay Kristo Hesus ja hini pamhod ju an amin hana tatakhun Apo Jos.

⁵ Hitay pammati ja pamhod ju ja nepognad ay tay mamahhod an enhachaag Apo Jos an michat hay hana namati ay hija. Ja inannila ju hini oma'-atan tay enhahagkhanan Apo Jos ad langit chin nanggolan ju ay tay umannung an Ebanghelyon Kristo.

⁶ Pfu-un cha'ju ja angkhay chi nangin-nila, ti nunchongor hitay Ebanghelyo hana apfuglapfuglay, ja maphod hini khuna ipfunga ay ni pi'takhuwan hana namati. Ja amat hina

khu hini pfunga na ay cha'ju nete-a chin nun-chongolan ja nanginnilaan ju ay ni umannung an oma'-atan ni khohkhoh Apo Jos.

⁷ Hi Epafras an oha an podpodhon mi an pun-ibpfa ay tay punserbiyan mi ay Kristo chi nah-hun an nanuchugwan ay cha'ju. Mapagtarkan hija an pfaar Kristo an khun mi honakhon an tomolong ay tay tamu mi.

⁸ Hijay nangpa-innila ay cha'mi ay ni otong an pamhod ju hay hana tatakhun Apo Jos khapo ay ni Espiritu Santo an gawwacha ay cha'ju.

⁹ Nete-a chin nangngolan mi hay hato, ja ingkhimoh mi an mangkalalakhan ay cha'ju. Hay kalalag mi ja hini Espiritu Santo ja ichat na koma an amin hini pannaka-awat ja maphod an nomnom ta annilaon ju hini penhod na an pe'-at ju.

¹⁰ Hot mi'takhu aju an me-anag hay hana nidchum ay Apo Hesus ta aton ju hana omepaanla ay hija ja pe'hehemad ju an amin hana maphod an khun ju aton, hot ma-ug-ugman hini panginnilaan ju ay Apo Jos.

¹¹ Hay kalalag mi ja papfi-ahon cha'ju ay Apo Jos khapo ay ni nakaskasda-aw an achi malukud an apfalinana, ta mun-an-anla aju an mangedpor nu ngachah chi hay ma'ma-at ay cha'ju.

¹² Khun aju koma munyaman ay Jos Ama, ti hijay nangpfilang ay chita-o an me'pfanoh hana mun-aphod an enchachaag na an ichat hana tatakhu na, chita-o an ni'tattakhu ay ni mumpapattar an pi'takhuwan.

¹³ Enekak chita-o ay Apo Jos ay ni munhehel-long an pun-ap-apugwan Satanas ja inidchum

chita-o ay ni mumpapattar an pun-ap-apugwan ni podpodhona an Empfalay na.

¹⁴ Khapo chin natajan tay Empfalay na ja nawayawaya-an ta-o, ti napakawan mahpay an amin chi pfahor ta-o an nidchum ay Kristo.

Hi Kristo chi napfagpfagto an amin

¹⁵ Hi Kristo chi pannikhan ay ni oma'-atan Apo Jos an achi matikhaw. Gawkwacha hija chin agkhuy narmugwan tay lota ja napfagpfagto hija mu an amin chi hay limmun Apo Jos.

¹⁶ Ti hi Kristo chi nangpa-apjaan Apo Jos an amin hana gwa ad langit ja hana gwah to lota, hana matikhaw ja hana achi matikhaw, ja hana a-ap-apon chi angher ja hana uchumna an achi matikhaw an gway apfalinana. An amin hana narmu ja hijay nunlumu ta madaydayaw hija.

¹⁷ Gawkwacha hi Kristo hi narmugwan an amin chi nagwacha, ja hijay khun mangpapto' ja mamanuh an amin.

¹⁸ Ja hijay ulu ta-o an amin an namati, ti hijay mangpapto' ay chita-o an achor na, ja hijay arpugwan tay pfakhu an pi'takhuwan ta-o. Hija hini nahhun an nummahu an achi mahpay matmatoy ta hijay napfagpfagto an amin.

¹⁹ Ti hay ene'chan Apo Jos ja gwa an amin ay Kristo hini kinajos na.

²⁰ Ja hijay ene'chan Apo Jos hi mangehnot ay hija an amin hana gwah to lota ja hichi ad langit. Ja khapo chin chala na an nun-ajuh chin natajana hichi kros ja ne'-oh-ohha cha ay Apo Jos.

21 Ja hijah tay chi na-at ay cha'ju. Chin hopapna ja ni-achawwi aju ay Apo Jos, ja pfuhur cha'ju ay hija khapo chin nomnom ja ugali ju an napukhit.

22 Muti penogpog Apo Jos chin pfimmuhulan ju ay hija chin natajan Kristo an i na nangdatunan chin anchor na, ta magpong ja maleneh aju hi pannig na, ja ma-id oh-ohha hi iju apahigwan.

23 Muti mahapor an tikhan ju ta etoloy ju an mamati ja ma-id i ju punharhalinchugwaan ja pehallaan. Achi aju koma makhinu ay ni pammati ju ta un juwot pi'hahalichit hini hadchon ju an ichat Apo Jos khapo hi namatiyan ju ay ni Ebanghelyo an chengngor ju. Hitay an Ebanghelyo ja hija khu hini khun mekasaba hi apfuglapfuglay. Ja ha-in an hi Paul, hija khu chi khun u itudtuchu.

Hini nunserbiyan Paul ay ni iglesia

24 Mun-an-anlaa' ad uwani khapo hay hato aparpalikhata', ti ipfunga nay ap-aplochan ju. Hay hato an uja' punlikhatan ja toloy hana likhat an ene'chan Kristo an horhortapo' ay tay khun u punserbiyan hay hana namati ay hija an chichay anchor Kristo.

25 Ha-in ayya ja enhaacha' ay Apo Jos an tomolong an amin hi namati ja impulang na ay ha-in hitay tamu' an mangpa-innila an amin ay tay hapit na ay cha'ju an Hentil.

26 Ti nete-a chin hophopapna ja gwacha an agkhuy impa'pa-innilan Apo Jos hi tatakhu, muti ad uwani ja impa-innila na ay chita-o an tatakhu na.

²⁷ Hitay hini plano na an impa-innila na ad ugwnani, an ipatikhaw na hini ma-id ipadpad-chungana an khohkhoh na ay cha'ju an Hentil. Ad ugwnani ja gwacha hi Kristo ay cha'ju ja hijah tay chi panginnilaan an ichatan cha'ju ay ni mapmaphod an pi'takhuwan ay Apo Jos ad langit.

²⁸ Hotti hi Kristo chi khun mi ipa-innila an amin hi tataku. Aton mi an amin chi hay manomnom mi hi aton an manukhun ja manud-tuchugwan an amin hi tataku ingkhanah mi'-ilog chi oha-ohanna ay ni pammati na ay Kristo.

²⁹ Hotti tayya an ehehemad u an mangat ay tay impatamun Apo Jos khapo ay ni pfi-ah ja apfalinan an inchat Kristo ay ha-in.

2

¹ Penhod u an annilaon ju hitay otong an paniar u an mangat hana ap-aphochan ju ja hana namati ad Laodisea ja an amin hana uchumna an agkhuy pay nannig ay ha-in.

² Ti podho' an pfumi-ah hini nomnom ju ja pomhod hini pun-oh-ohhaan ju khapo hi numpepennohhochan ju. Ja podho' khu an magwachaan aju hana napfalor an bindisyon an pfungan chi punchomo-an ju ay ni na-awatan ju an oma'-atan Kristo an agkhuy impa-innilan Apo Jos hichin hophopapna.

³ Hi Kristo ja angkhay chi pangalan ay tay napfalor an la-eng ja nomnom ta ma-innila hitay planon Apo Jos an agkhuy na impa-innila.

⁴ Inali' hay hato ta achi aju mepfallong hana hapit hay hana khun pfumarpfali.

5 Anong una' mama-id hina ja khun cha'ju chamchama nomnomnomon. Mun-an-anlaa' an nangngor hi khun ju pun-oh-ohhaan hi nomnom ja hi agwachaan chi nehamad hi pammati ju ay Kristo.

Hini pfakhu an pi'takhuwan ay Kristo

6 Inapfulut ju mahpay hi Kristo Hesus an Apota-o, hotti mahapor an mi'takhu aju an amat ay ni pi'takhuwan chi ohan takhu an nidchum ay hija.

7 Hotti hini pammati ju ay hija ja amat koma hi ajiw an anchu-oy chi lamot na, ja amat hi pfalay an napakhad ja nehamad chi tu-ud na. Amat heto chi nituchu ay cha'ju hotti aton ju hay hato an gwachaan hi panagyaman.

8 Tikhan ju ta achi aju mepfallong hana munhabit hi umallilaw ja hana ma-id chi poot na, an nepognad hi nomnom ja urchin chi tatakhu. Achi mi'padchung hay hato ay ni umannung an oma'-atan Kristo.

9 Ti hay umannung an oma'-atan Kristo ja numpfalin hi takhu muti gwacha chamchama ay hija an amin hini kinajos Apo Jos.

10 Hotti napfagpfagto hi Kristo mu an amin chi achi matikhaw an gway apfalinana, ja khapo hi ne'-oh-ohhaan ju ay hija ja gwa an amin chi mahapor ay ni pfakhu an pi'takhuwan ju.

11 Ja khapo ay tay nidchuman ju ay hija ja mipfilang aju hi nakugit. Muti pfu-un hini kugit an khun aton chi takhu, ti hini penhod u an allon ja hini nangaanan Kristo ay ni napfahulan an atatakhu ju.

12 Ti chin numpabautisaran ju, ja nidchum aju an ni'lupfu' ja ni'mahu ay Kristo khapo ay ni pammati ju ay ni apfalinan Apo Jos an nanakhu ay Kristo.

13 Chin pengpenghana, ja natoy aju hi panning Apo Jos khapo hi pfahor ju ja khapo ta agkhuy na-aan hana niihihikhud an napukhit an atatakhu ju. Muti ad ugwni, ja inchatan cha'ju ay ni pi'takhuwan an gwa ay Kristo, ja penakawana hana pfahor ju.

14 Ti hachi nitula' an urchin Apo Jos ja amat hi hijay nangchalom ay chita-o. Muti ma-id mahpay ma-at tay urchin ti enalan Apo Jos hini lehtaan chi pfahor ta-o ja empfakhat na hichi kros Hesus, hotti na-upfah.

15 Ja enameh Apo Jos hini apfalinan hana a-ap-apon chi nun-apupukhit an ispiritu ja hana uchumna an napukhit an gway apfalinana. Ja impatikhaw na chin natajan Kristo chin nangamehana ay chicha ta ma-innila an enaana hini apfalinan cha chuy an ispiritu.

16 Hotti achi ju chonglon hana manugi ay cha'ju khapo ta achi aju me'-ampoy hana allon cha an paniyaw, an amat hana ma-u'mun, ja hana metennagwon ja pfinulan an ngilin, ja hana Hapfachu an ngilin.

17 Hay hato an khun mitudtuchu ja un ágwan hana mepallog an umannung an ma-unud. Ti immali hini umannung an hija hi Kristo, hotti ma-id koma hana paniyaw.

18 Achi ju ekhokhongngahan hana tatakhu an mamahiw ay cha'ju, an mangali hi achi aju

mi'takhu ay Apo Jos khapo ta achi ju khun dayawon hana angher ja achi ju unuchon hini khun cha ipatpatikhaw an aton cha an mumpakumbaba. Allon cha hi un cha akha'khaja khapo hana nabnab-on an nipatikhaw ay chicha. Muti achi umannung, an un cha mumpa-akhaja, ti hini na-inlubungan an nomnom cha chi mangpadchong ay chicha.

¹⁹ Agkhuy cha neta-od ay Kristo an ulu ta-o an namati. Chita-o an achor na chi neta-od ay hija. An amin hato alimatong chi achor ja nun-oh-ohha cha khapo hay hana ulat an nangaputan hana laman, ja hana khalutkhut an nano'-op hana tungar. Ja nu neta-od cha ay ni ulu hot pfumi-ah ja pomhod cha. Amat hina khu hini penhod Apo Jos ay chita-o, an meta-od ta-o ay Kristo ta mun-oh-ohha ta-o, ja pomhod hini pangunuchan ta-o ay hija.

²⁰ Khapo ta ne-etoy aju ay Kristo ja pfu-un mah-pay hana urchin chi takhu chi mangpadchong ay cha'ju. Hotti anagkha ta khun ju pay unuchon hana ugalin chi na-inlubungan an tataku? Achi ju koma unuchon hana allon cha an,

²¹ "Paniyaw hi ugnan, paniyaw hi tamtaman, paniyaw hi ho'-on."

²² Hay hato ja un ab-apfig ja nehahalla an tudtuchu an enephod chi takhu. Ma-id inherpfcha, ti hay hato khun cha panijagwon ja inchat Apo Jos ta gway anun ja inumon ja angkhay.

²³ Oma'-at hi maphod hato an unuchon, ti ipapilit cha hini aton chi takhu an mange-ar-alla an mundayaw, ja hini aton an mumpakumbaba ja hana aton an mamalikhat ay tay achor. Muti

ma-id oh-ohha hi ma-itolong cha ta mepagwa
hana napukhit an podhon tay achor.

3

¹ A-akhi, khapo ta nidchum aju ay Kristo an ni'mahu, ja hay nomnomon ju ja hana gwa ad langit an gwachaan Kristo an inu-umpfun ay ni nun-appit hi agwan Jos Ama.

² Hana gwa ad langit chi nomnomnomon ju, pfu-un hana gwah to lota.

³ Ti natoy chin kanaman an nitakhuwan ju, ja nichatan aju hi pfakhu hi pi'takhuwan ay Kristo an gwa ay Ama na ad langit.

⁴ Ja machakngan ayya chin ipatikhagwan ni gloryan Kristo an narpugwan tay pfakhu an pi'takhuwan, ja matikhaw khu hini glorya ta-o an ninidchum ayhija.

Chu'khon ta-o chin napfahulan an pi'takhuwan

⁵ Mahapor an chu'khon ju chin napukhit an nomnom ja ugali ju. Epokhong ju hana akhakha'-ihaw an ugali, amat hana me-elo' hi pfu-un ahagwa, ja hana khun mangat ay ni napukhit an penhod chi achor. Achi aju na-amnagwan, ti hana na-amnagwan ja un hana khina-u heto lota chi jos cha.

⁶ Khapo hay hato an ugali ja umali hini pfungot Apo Jos hana tataku.

⁷ Amat heto chin nitakhuwan ju chin agkhuy ju immunuchan ay Apo Jos.

⁸ Muti ad ugwani ja epokhong ju an amin hay hato: hana pfungot, ja hana puma'-iyan hi

ibpfah takhu, ja hana pahiw, ja an amin chi hay napukhit hi hapit.

⁹ Ja achi aju munlahlah hi ibpfa ju hi takhu, ti chin-ug ju hana napukhit an nomnom ja ugali ju chin agkhuy ju namatiyan,

¹⁰ ja inchat Apo Jos ay cha'ju hini pfakhu an nomnom, ja khuna khu ipabpapfakhu ingkhanah oma'-at aju ay hija ja umannung an annilaon ju hija.

¹¹ Ay tay an pfakhu an pi'takhuwan ad ug-wani ja numpapadchung ta-o an ma-id chi hay akha'khaja, Hudju ja Hentil, nakugit ja agkhuy, ja hana narpu hi uchumna an pfuglay an numpfino-ob-on chi hapit ja ugali cha, ja hana ma-id achar na, himpfut ja pfu-un. Hi Kristo chamchama ja angkhay chi ma-ar-ali ja gawwacha hija ay chita-o an amin an namati.

¹² Hotti cha'ju an pinilin Apo Jos an tataku na ja an podpodhona, ja hay hato chi aton ju. Manghinkikinna-ahi aju ja muntitinnolong aju. Mumpakumbaba aju ja na-umlong ja na-anuh aju.

¹³ Anuhan ju hana pungkulangan hana papad-chung ju an tataku, ja manghempepennakawan aju nu gway pfimmahor ay cha'ju an amat ay ni enat Apo Jos an namakawan ay cha'ju.

¹⁴ Ja achi omanay hay hato, ti mahapor an gway pamhod. Ti nu makha-utan aju ayya hi pamhod hot mehamad hini pun-oh-ohhaan ju.

¹⁵ Pachot-anan ju hini i ju pun-oh-ohhaan hi nomnom khapo hi ne'-oh-ohhaan ju ay Kristo. Ti enajakhan chita-o ay Apo Jos ta mun-oh-ohha ta-

o an amat hi ohah achor. Ja khun aju munyaman ay hija.

¹⁶ Hay hana hapit Kristo ja etoloy ju an khokhotan ta pa'-innilaon ju. Inchatan cha'ju hi maphod an nomnom ta khun aju manghinitittinnuchu ja manghintittinnukhun. Ekanta ju hana Hapit Apo Jos an Psalm, ja hana uchumna an kantan chi namati an pundayaw ay Apo Jos ja mangpapfi-ah hi pammati an gwachaan hi panagyaman ay Apo Jos.

¹⁷ Cha'juy tatakhun Hesus an Apo ta-o hotti mahapor an pa-ennongan ju an amin chi aton ja hapiton. Ja khun aju munyaman ay Jos Ama khapo ay ni enat Hesus.

Hay mitukhun hana pamilya

¹⁸ Cha'ju an pfinapfai, mahapor an na'na-unnuud aju hana enah-ahagwaan ju, ti hitay chi aton chi hay nidchum ay Apo Hesus.

¹⁹ Ja cha'ju an linala-e, mahapor an podpodhon ju hana enah-ahagwaan ju ja achi aju mabmap-fungot ay chicha.

²⁰ Cha'ju khu an empfapfalay, unuchon ju an amin hana tukhun hana a-ammod ju, ti hitay chi penhod Apo Jos an ugalin chi namati.

²¹ Cha'ju an a-ammod an linala-e, tikhan ju ta achi munheglay aton ju an humingar hay hana empfapfalay ju, ti pfumanug cha.

Hay mitukhun hana himpfut ja hana a-ap-apo cha

²² Cha'ju an himpfut, unuchon ju an amin chi allon hana a-ap-apo ju heto lota. Pa-ennongan ju an muntamu, anong un cha'ju achi titigkhan,

ti pfu-un hay takhu ja angkhay chi khapo na hi i ju puntamuwan ta podpodhon cha'ju, muti aton ju khapo ta podhon ju, ja podhon ju khu an munserbi ay Apo Hesu Kristo.

²³ Nu ngachah ni tamuwan ju ja ipa-annung ju koma, ti hi Kristo chi punserbiyan ju an pfu-un hay padchung ju an takhu.

²⁴ Ti anila ju an gway lagpfu ju an hija hini pfanoh an ichat Kristo, ti hi Kristo hini Apo an khun ju punserbiyan.

²⁵ Muti hana ayya muntortloy an mangat hi napukhit ja hay pundusaan Apo Jos chi hahad-chon cha, ti ma-id chi hay akha'khaja ay Apo Jos, ti punchichipatona hini atona an manugi hi tatakhu.

4

¹ Cha'ju an a-ap-apon chi himpfut, ja ono'nongan ju ta hay magpong chi aton ju ay chicha. Ti anila ju an anong un cha'ju ja gway Apo ju ad langit an manugi ay cha'ju.

Hay mitukhun an amin hana namati

² Hay oha hi allo' ay cha'ju an amin, ja itug-tukha ju an khun mungkalalag, ja enhehemad ju, ja khun aju munyaman ay Apo Jos.

³ Mungkalalag aju ayya ja khun cha'mi pidchum an ekalalakhan. Epfokha ju ay Apo Jos ta hijay mangpa'-igwin hay homalegwa ay ni i mi aton an mangtudtuchu ay ni oma'-atan Kristo an agkhuy nipa-innila chin hophopapna. Hitay an khun mi itudtuchu chi khimmapo hi uja' nipfaluchan ad ugwani.

⁴ Ekalalakhana' ta hini ato' an muntudtuchu ja nalaka hi ma-awatan, ti hitay chi amatan chi muntudtuchu.

⁵ Ep-ephod ju an mi'takhu ta ma-id koma pahigwon hana agkhuy namati, ja meha-hagkhana aju an amin hi timpo an mangali ay ni oma'-atan Kristo.

⁶ Tikhan ju ta megngor ja ma-uloy hini aton ju an mangali ja annilaon ju koma hini maphod an pampfar ju hi oha-ohanna an gway epfokha na.

⁷ Hi Tikikus ja oha an akhi an namati an podpodhon ta-o. Hijay honakho' ta ipa-innila na ay cha'ju an amin hana na'na-at ay ha-in. Mapagtarkan hija an khun tomolong ay ha-in, ja padchung u an khun munserbi ay Apo Hesus.

⁸ Hijaot un u honakhon hija ta ipa-innila na hini oma'-atan mi heto ja ta ipapfi-ah na hini nomnom ju.

⁹ Hi Onesimus an narpu hina ja oha khu an mapagtarkan an ibpfa an podpodhon ta-o. Hijay pun-ibpfan Tikikus an umali hina ja ipa-innila cha an amin hana na'na-at heto.

¹⁰ Hi Aristarkus an ni'pfabpfalud ay ha-in ja pakumustaan cha'ju, ja amat khu ay Mark an ibpfan Barnabas. Hi Mark chin inali' an mangiliyon ju hu-un umali hina.

¹¹ Ja pakumustaan cha'ju khu ay Jesus Justus. An amin hana Hudju heto an namati, ja un angkhay hay hato tolo chi nun-i-ibpfa' an khun muntudtuchu hato tataku ta gway aton cha an midchum ay ni Pun-ap-apugwan Apo Jos. Mun-an-anlaa' khapo hi tolong cha ay ha-in.

¹² Hi Epafras an narpu hina gwachaan ju an

khun munserbi ay Kristo Hesus, ja tan pakumustaan cha'ju. Itugtukha na an mangkalalakhan ay cha'ju ta mehamad hini pammati ju ja pa'-innilaon ju an amin hana penhod Apo Jos.

¹³ Tihtikhuwa' hana liya' na an khun manamuwan hay hana ap-aplochan ju, ja hay hana khu namati ad Laodisea ja Hierapolis.

¹⁴ Ja pakumustaan cha'ju khu ay Luke, hini podpodhon ta-o an choktor, chicha ay Demas.

¹⁵ Allon ju hana i-ibpfa ta-o an namati hichi ad Laodisea an pakumustaa' chicha, ja amat khu ay Nimfa ja hana namati an khun mummeha ay ni pfalay na.

¹⁶ Napfalin ayya an empfaha ju hitay tula' ja impi-uy ju ad Laodisea ta pe'pfahan hana namati an khun ma-amung an mummeha hichi. Ja gwa khu han tula' u hichi ad Laodisea hotti pe'pfaha ju khu nu ipa-ali cha ay cha'ju.

¹⁷ Ja allon ju ay Arkipus ta ikhibpfoh na hini tamu an impulang Apo Hesus ay hija.

¹⁸ Ha-in an hi Paul chi nangkhulit ay tay me-ang-angonoh an tula'. Omod aju hina? Achi ju alichuwan an nipfabpfalucha' pay hotti ekarkalalakhana'.

Hi Apo Jos chi mangkhohkhohan ay cha'ju an amin.

Mayoyao Ifugao

Ifugao, Mayoyao: Hapit apo jos New Testament

copyright © 2003 Wycliffe Bible Translators, Inc.

Language: Ifugao, Mayoyao

Contributor: Wycliffe Bible Translators, Inc.

All rights reserved.

2025-05-03

PDF generated using Haiola and XeLaTeX on 3 May 2025 from source files
dated 3 May 2025

d84c1243-537d-5e7f-bf60-3ed1069375e4